

Rodēnēnē ruožē

Ak to, ruožē vėlīvuoji,
Ak to, skaistos žėidė...
To atruodā iškilmingā,
Ruodos himnus gėidi.
Klevā, oužolā paroda
Met jau laps pu lapa.
Rodou – dailininks pašielės,
Auksa spalvuoms tapa...
Kėik če prabonguos, kėik torta,
Net užtrauk ər dvasė.
Kor pažvielgsi, paveiziesi,
Vėin stebuklus rasi...
Kad ər liūdna, ər graudinga,
Bet matā tik gera.
Dėltuo kartās nebsuprasi,
Kas iš pruota vara.
Ak to, ruožē vėlīvuoji,
Nuostabiausis žėidė,
Tavi dievėškā sukorta
Unt šalnū nusvėidė.
Vo to žīdi, to svīrouji
Ruodos, šuoktė šuoki...
Unt tuo graudulinga lauka
Pavuojinga šuoki.
Tava gruožė, tava kvapa
Bijuos patės šalnas
Saulė, lėgo muočė, parskob
Per padungiu kalnus.